

16 MAC 2023



Lelaki Orang Asli meninggal dunia ketika cari buluh

PETALING JAYA - Seorang lelaki Orang Asli ditemui meninggal dunia selepas dipercayai sesat ketika mencari buluh di Bukit Damansara di sini pada Selasa.

Pengarah Bomba Selangor, Morni Mamat berkata, pihaknya menerima panggilan mengenai insiden orang hilang pada jam 10.42 malam sebelum sepasukan anggota dari Balai Bomba dan Penyelamat (BBP) Damansara dikejarkan ke lokasi.

Menurutnya, mangsa berusia 48 tahun dikatakan telah keluar dari rumah pada jam 8 pagi dan sepatutnya pulang pada 2 petang.

"Bagaimanapun, sehingga jam 8 malam, ahli keluarga memaklumkan mangsa yang mempunyai sejarah penyakit jantung masih belum pulang ke rumah.

"Pihak bomba yang tiba di lokasi menjumpai motosikal mangsa dan usaha mencari dijalankan bersama ketua komuniti dan penduduk Kampung Desa Temuan," katanya pada Rabu.

Beliau berkata, mangsa akhirnya dijumpai dalam keadaan tidak sedarkan diri pada jam 11.33 malam di atas bukit dalam jarak kira-kira 300 meter dari lokasi motosikalnya.

Katanya, mangsa telah disahkan meninggal dunia oleh pihak hospital.